

1PE -

1 Piyerə

Təntən sagı tə,

Piyerə

nə púpúní

Piyerə təntən sagı tə yuu wa sugu

Lìù tə, v nə púpúní sagı ku tə

Sagı ku tə yí *tuntunu Piyerə nə púpúní ku.

Lìà tə nə, v nə púpúní

Piyerə púpúní v sagı tə v pa *Kərisə lìa tə nə, ba nə wulə luv tə mama wa. Silasə də san wá ku púpúnú wa.

Sagı tə wa sugu

Nəŋə ku tə yırı, v nə púpúní ba nə: *Kərisə lìa tə wulə càn wa, ba nə ken ba waa Zwezi nə tə yırı. Ba vànà wulə tə gwàrì.

Piyerə púpúní ba nə, sə v ma dàn ba jìàn ba nə ken ba waa Zwezi nə tə yırı, də yala tə yırı, ba nə jə də wá. U swìn ba con, sə ba twá Yu cwəŋə tə nə zəni, də pùé nədu.

1

Təntən jùnà bwálí

¹ À mù Piyerə yí Zwezi-*Kərisə *tuntunu. À mù nə púpúní sagı ku tə, à pın

á mù làà tə nə, Yu nə kúrí. Á dəri á zu Pon, də Galasi, də Kapadósa, də Azi, də Bitini nagwanɛ tə wa. Á jigə vərə tə bwálá təntə wa. ² Á yɪ nə nyina Yu nə kúrí aba, v tún vən nə, ku nə ba yigə, ndə v nə tanɪ ku, sə ku ya nətu. Á twá v *Siɲu tə nə, v pa á jì v làà, á yá á tiàn míámíán Yu jìàn wa, sə á sè Zwezi-*Kərisə nii. Yá Zwezi-Kərisə jana tə dàń wá sɪn á cuna tə, tə lɪ. Yu nə wá fwa pubwanv á yira, v ga pa aba v bɪcan sió, tə nə sùrí wuuu.

Yu pɪn nəba Yu, ku nə ba zwè v con

(Efɛzə tián 2.4-8, Romə tián 8.17-18, 16.25-26, 2 Korəntə tián 4.17-18)

³ Nə bwia Yu nə. U yɪ nə *Yuu-Tiu Zwezi-*Kərisə nyina. U mù nə pɪl v bwin Zwezi-Kərisə v lɪ tian wa. Yá v dəri nə yinəgə zənzən. Ku pɪn v twá ku bwiun tə nə, v pa nəba mu nədɒn də yala, mánjá mama wuuu. ⁴ Ku mù nə pɪn, nə yèə də, Yu tanɪ twərə v tún nə nə, Yu *sàń nə. Wiən təntə wàri tə cùgà. Durən wàri tə tə zwɪ, tə zəni ga wàri tə zwè. ⁵ Nə mù kəni nə waa Zwezi nə wuuu. Yu wá twá ku nə, v cì nə nə, də v diàn tə. U wá jon nəba v kə mu wa, ku nə ba zwè v con. U wá bɪri nəba mu təntə, luv zaɲu mánjá wa.

⁶ Ku mù nə pɪn, yìèn yiri mama nə swə tə mɛ, sə tə wuwali aba, mánjá mancɪn ku tə wa, á mɛ, sə á tə ya pupwən nəfarv wa á jwɛ. ⁷ Yìèn təntə wuwali aba, sə ba ma lwarɪ də, á nə keni á waa Zwezi nə wuuu, cígá cígá. Nə wàá síán nə tì nə ma maɲa ku. Síán yɪ won tə, ba yàá kə mən wa, sə ba ma na də, tə nə ziən. Yá tə ga yɪ won, tə nə wá cùgè tə jén dun don nə. Mə ku yɪ nətu də á də nə kəni á waa Zwezi nə wuuu. Ku jə funə ku doni síán. Á nə zɪgɪ diàn ku yoo tə wa, ku mù nə wá pa, Yu bu á nə, v ga pa aba dun, v ga zɪlɪ aba mánjá tə, Zwezi-Kərisə nə wá pɪl v bà, v bɪri v tiàn, v nan á yíá yuu. ⁸ Á wà Zwezi nɪ, yá á ga swə wá. Á ba wá na síún nə, yá á tə kəni á waa v nə wuuu. Ku mù nə pɪn, á sú də pupwən nəfarv. Ku pupwən təntə dwə ku tə, liù nə wàá v swìn də v nii. ⁹ Á kəni á waa Zwezi nə wuuu. Ku

ɲwírán nə yɪ, Yu nə jon aba, ʋ kə mu tə wa, ku nə ba zwè ʋ con.

¹⁰ Máná don wa, Yu nii *sùsùnà ken diàn, sə ba lwarɪ ku tə nə yɪ, Yu jon ba ʋ kə mu wa, ku nə ba zwè ʋ con. Ba dí yáá ba swìn Yu pubwanu tə yoo, ʋ nə tanɪ, sə ʋ fwa á yɪra. ¹¹ Yu-*Siɲu tə yà wulə də ba. Yá ku mù nə swìn tə yìèn tə ba con. Ba yà ken cígá, sə ba lwarɪ máná tə də won tə nə, Kərisə càn tə də ʋ dun, tə nə wá twá, tə ma bà. ¹² Yu-Siɲu tə gwin tə yìèn təntə dèń, ku bɪrɪ ba. Yá tə yìèn təntə yà tà ba mù nə wá na tə ba yíá wa. Yá ku lwàń, ku yɪ á mù yɪrɪ. Síún nə, là tə, ba nə swìn suywáɲú tə, dàń swìn tə yìèn təntə, ba bɪrɪ aba. Ba swìn tə də Yu-Siɲu tə, ʋ nə tun tə, diàn. Yá Yu *malíkə tə tətə yà sóní, sə tə də yəni tə yìèn təntə.

Yìèn tə Kərisə liù nə mɛ, sə ʋ fwa

(1 Tesalonikə tián 5.8-9, Efɛzə tián 5.1, 1 Korentə tián 6.20, Titə 2.11-14)

¹³ Ku nətu tə yɪrɪ, á kənə á pubuɲa bwálí nədu, sə á va yáá. Á pian á ya là tə, á nə yèé yoo dèń. Á kənə á yala mama, Yu pubwanu tə nə. Máná tə, Zwezi-*Kərisə nə wá pìí ʋ bà, ʋ bɪrɪ ʋ tiàn á yíá yuu, ʋ wá fwa ʋ pubwanu təntə á yɪra. ¹⁴ Máná don yɪn lá, á yà yəri Zwezi-Kərisə, á ga twá á pùé yokukwɪnan fɪra nə. Á kùbè dàn ká pìí á twá tə nə. Síún nə, á dàń yana ndə bìsíná nə, ba nə sè nii. ¹⁵ Yu dàń kúrí aba, ʋ ga yɪ bɪcapon tíú. Á də mɛ, sə á jì bɪcapon tián, ndə Yu nə, á tùtùnán mama wa. ¹⁶ Ku púpúní Yu sagɪ tə wa, ku wó: «Á yana là tə, á nə yɪ bɪcapon tián, ndə à mù Yu nə yɪ bɪcapon tíú nətu.»

¹⁷ Á yɪjɔnɪ wa, á yàá boɲə Yu á nyɪna. ʋ mù nə yɪ liù tə, ʋ nə ba liù kúrí, ʋ ma bùrɪ ku tíú bura, ku tə yɪrɪ, ʋ nə fwa. Máná tə wa, á nə wulə tia yuu wa, á dàń mɛ, sə á zílí wá zənzən. ¹⁸ Ku yɪ cígá, á tun tutunkukwɪnan tə, á nyɪna-ba nə ma kwè aba. Tə yìèn təntə yà ba dèń jə. Á yèé, Yu ɲwín ɲwírán nəfarɪ, ʋ ma yè aba ʋ jon, tə yìèn təntə yɪrɪ. Ku tə, ʋ nə ɲwín, ku tà ndə səbiu nə, ku nə wàá ku cùgà. Ku tə, ʋ nə ɲwín, yɪ ku cɪcɪ. ¹⁹ ʋ pin

Zwezi-Kərisə yi ndə *pabiə nə, ba nə gua, ba ma fwa *jonji. Cuna yà təló v yuu wa, v ga ba durən jə. Yá ku yi Zwezi-Kərisə jana tə, tə nə jə funə zənzən, Yu ma yè aba v jon.²⁰ Yu yà dí yáá v kúrí Zwezi-Kərisə, v tún ku yiri, də luv tə wà fwa. Ku kwa nə, v biri wá aba luv zaŋv mánjá tə nə, á mù zəni yiri.²¹ Ku twá Zwezi-Kərisə nə, á ma kə á waa Yu nə. Yu pìí v bwin wá v li tian wa, v ga pa wá dun. Ku mù yiri, á kəni á waa v nə wuuu, á ga jə yala də wá.

²² Á sè á twá Yu sugv tə nii nə, ku nə yi cígá. Ku pin á bicanı yi nəpon á ga swə lià tə, ba nə yi Kərisə lià tə, də cígá cígá sonu. Á dān swìn á con, sə á sóní duən zənzən mánjá mama də bican nəpon.²³ Á yèé də, Yu twá v sugv tə nə, v ma pa aba mu nədvn. Ku sugv tə wulə wuuu, ku ba zwè mama. Ku wà twá də ləzwənə tə, v nə wàá v ti, v ma pa aba mu təntə.²⁴ Ku púpóní Yu sagı tə wa, ku wú:

«Ləzoni tə mama yi ndə gav nə, ba dun də me yi ndə wopunə nə. Gav yàá ku, ku punə tə ga twi tia.²⁵ Yá *Yuu-Tiu sugv tə mù dān wulə wuuu, ku ba zwè.»

Ku mù sugv təntə nə yi Yu suywánú tə, ba nə swìn ba biri aba.

2

¹ Ku mù yiri, á lia á tiàn wuluv, də gıgıra yiri mama wa. Á dānà ká ya níó bələ tiàn. Á dānà ká zıga lià duən nə, ku tiàn wiən yiri. Á dānà ká swìn yolwan á pa lià nə.² Á yana ndə bısíní nə, ba nə lıri síún, ba ga pìà yuli mánjá mama. Á mù yuli nə yi Yu sugv tə. Ku yi yuli tə, won nə wà ku waa gùlí. Ku mù nə wá pa á boru, ku ga wá pa Yu jon aba, á cuna tə wa.³ Á cígá nı də, *Yuu-Tiu ywán zəni, ndə ku nə swìn nətv, Yu sagı tə wa.

Zwezi yi ndə diè nigwancun wárí nə

(Efəzə tiàn 2.20-22, Tòtònán 4.11-12, Matia 21.42-44, Romə tiàn 9.24-26)

⁴ Á dàń fàrá á yí *Yuu-Tiu yíra. U yí liù tẹ, u pin mu. U yí ndẹ kẹpan wáńí nẹ. Lẹzoni viga wá ba dugu, ndẹ wotutu nẹ. Yá Yu kúńí wá u tún, u ga jẹ funẹ zẹnzẹn, u mù Yu yáá con. ⁵ Á dẹ yana ndẹ kapana tẹ nẹ, tẹ nẹ nẹgẹ, sẹ Yu tì aba, u ma lwà dìẹ, u pa u *Siṅu tẹ nẹ. Ku twá dẹ Zwezi-*Kẹrisẹ, á dàń wá ya u mù cici *jọṅwana ku dìẹ tẹ wa, sẹ á twá Yu-Siṅu tẹ á tun á pa Yu nẹ, ndẹ *jọṅi nẹ á pin wá. Yá ku nẹtu tẹ poli Yu pùé. ⁶ Ku púpúní Yu sagi tẹ wa, ku wú:

«Á nẹgẹ, à tún kẹpan tiu tẹ wa, ba nẹ boṅẹ “Siyon*f1*”, sẹ à lwà à dìẹ ku yuu wa. Ku yí dìẹ tẹ nigwancun wáńí. À kúńí ku, ku ga jẹ funẹ zẹnzẹn à yáá con. Yá liù tẹ, u nẹ ken u waa ku kẹpan tẹntẹ nẹ, u bá dẹ cavira mama.»

⁷ Á mù lià tẹ, á nẹ ken á waa ku nẹ, ku yí won tẹ, ku nẹ pin á jẹ dun zẹnzẹn. Yá ku tà nẹtu lià tẹ con, ba nẹ wà ba waa ken ku nẹ. Ku púpúní Yu sagi tẹ wa, ku wú:

«Ku mù kẹpan tẹntẹ, dẹlwẹrẹ tẹ nẹ viga ba dugu vẹn nẹ, ku mù nẹ pìi ku jì dìẹ tẹ nigwancun wáńí, ku yoo nẹ cà. Ku jigẹ kẹpan, lià mà ba nẹe ku nẹ, ba twi.»

Ku kúbù púpúní Yu sagi tẹ wa, ku wú:

«Ku mù kẹpan tẹntẹ pin, lià duga cwẹgẹ ba jén.»

⁸ Ku yí ba nẹ wà Yu sugu tẹ nii sẹ yíri. Yu nẹ ken, sẹ ku ya nẹtu ba yíra.

⁹ Yá á mù dàń yí dwíí tẹ, Yu nẹ kúńí. Á yí *jọṅwana púlí tẹ, á nẹ tuṅa á pin u mù pìú tẹ nẹ. Á dwíí tẹ ya Yu cici nẹ ti. Á yí Yu tẹtẹ púlí u nẹ tún. U kúńí aba, sẹ á swìn yìèn nẹfaran tẹ, u nẹ fwa, á bírì lià nẹ. U yí liù tẹ, u kúńí aba, u lí yikunu wa, u kẹ u poni nẹfaru tẹ wa. ¹⁰ Dí yáá nẹ, á yà tà Yu púlí, u nẹ tún. Yá síún nẹ, á dàń yí Yu nẹ ti. Dí yáá nẹ, Yu yà wà á yinẹgẹ zẹnzẹn dẹri. Yá síún nẹ, Yu dàń dẹri á yinẹgẹ zẹnzẹn.

Kẹrisẹ lià nẹ mẹ, sẹ ba ya nẹtu

(Romə tián 13.1-8)

¹¹ Á nubisoni-ba, á lie á tián də, á yi vərə tia yuu wa. Yá á ga yi là tə, á nə lɛ. Ku mù tə yiri, à dǎn kwè aba, sə á lɪ á tián yìèn tə wa, tə nə yi ləzwənə pùé yokukwɪnən fira. Tə yìèn tǎntə yáá kəni diàn, sə tə cùgù aba. ¹² Á pian á tutunɛɛ mama ya zəni, là tə nə tà Kərisə là yáá con. Á nə jə á tián zəni, ba nə swə ba swìn də á fwa lwanɪ, ba wá na á tutunzəŋə tə, á nə tuŋa. Yá ba dǎn wá bu Yu nə, dun tə nə, v nə wá bà.

¹³ Á tàà *Yuu-Tiu yiri, á sè là tə mama nii, ləzoni nə lɪ ba tún, sə ba yà á yun tián. Á siá pìú tə nii, v nə jèó á luv nii pègá tə mɛ yuu wa. ¹⁴ Á siá yáá tián tə nii, pìú nəfarv tə nə lɪ v tún. U yi v tún ba, sə ba kə là tə, ba nə fwa ku tə nə lwara, càn wa. Yá ba ga bu là tə nə, ba nə fwa ku tə nə ziən. ¹⁵ Yu fira tə yi, sə á fwa ku tə nə ziən, sə ləyirən tə, də là tə, ba nə ba yənu jə, ba ga cəgə aba, pú ba níó. ¹⁶ Á yana là tə, á nə ti á tián, Yá á dǎnà ká tàà á nə ti á tián tə yiri, á fwa lwanɪ liù yira. Á dǎn mɛ, sə á ya ndə nətv Yu tòtònà nə mɛ, sə ba ya. ¹⁷ Á pian dun liù mama nə. Á swéné á duən Kərisə là tə. Á zìló Yu zənzən. Á pian dun pìú tə nə.

Á díó càn ndə Kərisə nə

(Efɛzə tián 6.5-8, Titə 2.9-10, 1 Piyerə 3.14-18)

¹⁸ Ywəŋə-ba, á siá là tə nii, ba nə yè aba. Á zìló ba zənzən. Á dǎnà ká fwa ku, ba tə cɪɪ yira, ba nə jə aba də bɪcabwanv. Á fwa ku ba tə də yira, ba yoo nə dà. ¹⁹ Liù wàá càn v dó, v nə zìlí Yu yiri, v ga wà won fwa, ku nə ba ziən. Ku tíú nə sè, v dó tə càn tə, ku yi Yu pubwanv. ²⁰ Ba nə firi aba á yolwana yiri, á nə fwa, ku ba dun jə ku pa aba. Yá ku dǎn nə yi zəni nə, á fwa, ba ga kə càn á nə, yá á píní á dó tə, ku yi Yu pubwanv. ²¹ Zwezi-*Kərisə tətə nə dí càn, v pa aba. U fwa ku nyɪnyɪga, v bɪɪ aba, sə á ma wàní á fwa, ndə v nə. Yu kúrí aba, sə á dó càn nətv. ²² U yi liù tə, v nə wà cuna fwa. U ga yi liù tə, kunkun nə wà v nii wa nan. ²³ Ba nə twɪn

wá, v wà ba twín, v ma ɲwín. Ba ken wá càn wa, v wà ba nii nə ba. U tì v tiàn, v kə Yu jìàn wa. Yá Yu nə bùrì bura, ku nə yì cígá. ²⁴ Zwezi-Kərisə tətə nə zín nə cuna tə v yuu wa, v ja ti dagarv tə yuu wa. U fwa ku, sə nə ya là tə, nə nə lɪ nə tiàn cuna wa. U fwa ku, sə nə ya mu wa, nə ga fwa yìèn tə, tə nə yì cígá. Ku twá v nuran tə nə, á nuran tə ma zwè. ²⁵ Cígá, á yà yì ndə pee nə, tə ywàɲa. Yá síún nə, á pìí á bà á twá liù tə nə, v nə cì á nə, v ga ywàɲá á yuu.

3

Kan də v bari nə me, sə ba ya nətu duən nə

(Kolosa tiàn 3.18-19, 1 Timote 2.9-15, Efəzə tiàn 5.22-23)

¹ Síún nə, á mù kana-ba də con, á liù mama me, sə v sè v bari nii. Á nə fwa nətu, á nə swə á wà yoo swìn ba con, á bana tə duən, nə wà ba waa ken Zwezi nə, ba wá twá ku nə, ba sè wá. ² Ba wá na də, á yì là tə, á bicanɪ nə yì nəpwənə á tutunɛɛ mama wa, á ga jə zìlɔ də. Ku mù nə pɪn, ba wá sè Zwezi. ³ Kana vwe ba yun, sə tə ya zəni. Ba kəni síán zanan ba bian nə, yá ba ga zwɪ ganzəɲə. Yá á mù, á dənà ká pa tə wiən təntə, ba nə na yíá wa, ya á bwaɲa wiən. ⁴ Ku tə nə me, á yana là tə, á nə jə bɪcabwanv, á ga yì sənɓwen. Ku nətu dān wá bɪrɪ də, á bwaɲa tə yì ku wulə á waa con. Ku mù bwaɲa təntə yiri ba zwè. Yá ku bwaɲa təntə ga jə funə zənzən, Yu yáá con. ⁵ Mə fuən kana tə, ba nə yì Yu cɪcɪ nə ti, ba nə jə yala Yu con, bwaɲa yà yì nətu. Yá ba ga sè ba bana nii. ⁶ Mə nətu nə *Abərahamə kan Sara yà yun. U yà sè v bari nii, v ga boɲə wá v “yuu tíú.” Á də jigə ndə Sara, də á nə fwa zəni ndə v nə, á ga wà sè, á pa fən yiri mama zu aba.

⁷ Síún nə, á də kanbana-ba, á liù mama me, sə v ja v kan zəni. Á me, sə á lwari də, kana tə bwànà, ba doni aba. Yu pɪn mu tə, ku nə ba zwè v con, á mù də ba mù me nə. Ku twá də v pubwanv tə. Ku mù nə pɪn, á dān zìlɔ ba

ku nətʊ tə yɪɾɪ. Á nə fwa nətʊ, won wàɾì á yɪjʊnɪ yáá nə ku cì, sə Yu ba le.

Ka fwa zəni yoo

(Romə tián 12.14-21, Matia 10.24-31, 1 Piyerə 2.12, 19-20)

⁸ Sə à ma gúrí, à swìn yìèn tə tə á con: Á pian, á mama ja pubuŋa nədʊ. Á pian, á yojanʊ ya nədʊ. Á swóné á duən *Kərisə lià tə. Á dərə duən yinəgə. Á muŋə á tiàn duən yáá con. ⁹ Liù nə fwa aba lwanɪ, á dànà ká fwa ku tíú lwanɪ, á ma ŋwín. Liù nə twɪn aba, á dànà ká twɪn ku tíú, á ma ŋwín. Yá á dàn mɛ, sə á lòrì Yu, sə ʊ fwa zəni ku tíú yuu wa. Yu kúrí aba, sə á na zəni tə, ʊ nə wá fwa á yɪɾa. ¹⁰ Ku púpúní Yu sagɪ tə wa, ku wó:

«Liù nə pià, sə ʊ ya lʊw wa zəni də pupwən, ku tíú dàn ká swìn sukukwɪnan ʊ nii wa. ʊ mɛ, sə ʊ cì ʊ tiàn nə, ʊ dàn ká kuna kunkun də. ¹¹ Ku tíú mɛ, sə ʊ li ʊ tiàn yoo tə wa, ku nə lwara. ʊ dàn mɛ, sə ʊ fwa ku tə nə zìən, ʊ ga pià bɪcən sìó də ʊ yaŋwɪa mama. ¹² *Yuu-Tiu ywàŋá lià tə mama yuu, ba nə yɪ cígá tián. Mánjá tə, ba nə jùnì wá, ʊ yáá cɪga ba yɪjʊnɪ. Yá Yuu-Tiu dàn zɪga lià tə nə, ba nə fwa ku tə nə lwara.»

¹³ Wàà dàn nə wá fwa aba lwanɪ, də á nə ken á yawala mama lá, sə á fwa ku tə nə zìən? ¹⁴ Yá á nə swə, á na càn cígá tə yɪɾɪ, á mɛ, sə á ya pupwən wa. Á dànà ká dəri ləzoni fən. Á dànà ká pa ku yoo yì aba. ¹⁵ Ku tə nə mɛ, á pian dun Kərisə nə, á waa con. ʊ mò nə ya á Yuu-Tiu. Á kənə á sírí mánjá mama, sə á wàní á le lià tə mama, ba nə bwe aba, á yala tə yuu wa, á nə jə də Zwezi-Kərisə. Á fwa ku yoo tə də bɪcabwanʊ, sə á ja zìlɔ zənzən. ¹⁶ Á pian, á pubuŋa ya pubunzəŋu. Ku nətʊ wá pa cavɪra ja lià tə, ba nə swìn ba zɪga á nə, ba twɪn aba, á tutunɛɛ mama nə zìən Zwezi-Kərisə cwəŋə tə wa yɪɾɪ. ¹⁷ Á nə dí càn, á nə fwa zəni yɪɾɪ, ku ga yɪ Yu fɪra, ku zìən ku doni, á nə dí càn, lwanɪ yɪɾɪ, á nə fwa.

(1 Piyerə 2.21-24, Ebərə-ba 11.7, Romə tián 6.3-4)

¹⁸ Cígá, Zwezi-Kərisə tətə tɪga nə cuna tə yɪɾɪ, naa nədu. U m̀l̀u l̀u t̀, v nə yɪ cígá tíú, v tɪga l̀à t̀ yɪɾɪ, ba nə tɪŋa kunkun ỳèn. U fwa ku t̀, sə v ma van aba, v pa Yu nə. Ba lɪ v mu luv wa, yá Yu-Sɪŋu t̀ pɪn, v p̀í v bwin v nan. ¹⁹ Yu-Sɪŋu t̀ d̀án pɪn, v va v sẁn Yu sugv t̀ l̀à t̀ con, ba nə wulə tɪga bwálí nə b̀án d̀è wa. ²⁰ Ba m̀l̀u l̀à t̀ntə yɪ l̀à t̀, ba nə vɪga, sə ba z̀lí Yu nii fuən fuən, m̀áná t̀ wa, Yu nə fwa p̀nú d̀ə ba.

Mə ku m̀áná t̀ wa, Nowe yà wulə v fwa níá yuu bori t̀. L̀à wà d̀aní yɪn, ba nə zva níá yuu bori t̀ntə wa. L̀à nana cɪcɪ nə jon ba t̀àn níá t̀, m̀áná wa. ²¹ Ku yoo t̀ntə nə yɪ, ba nə ləgə aba níá t̀ wa, ku twá d̀ə Yu yɪɾɪ t̀, nyɪnyɪga. Ku m̀l̀u d̀án nə jonə aba s̀ún nə á cuna t̀ wa. Ku m̀l̀u níá swɪu t̀ntə, ba nə fwa aba, tà, sə ku sɪn á yɪra durən. Ku níá swɪu t̀ yɪ l̀òrì t̀, á nə l̀òrì Yu con, sə v pa á pubɪŋa ya pubɪnzəŋu. Ku níá swɪu t̀ jonə aba á cuna wa. Ku nətu twá d̀ə Zwezi-Kərisə v nə p̀í v bwin, v nan tɪan wa.

²² Zwezi-Kərisə d̀ìgà Yu s̀án, v j̀ə Yu jɪzən*f1* v̀àn nə. Yu dí yáá, v pa *malɪkə t̀ d̀ə wɪən t̀ mama nə jə d̀àn, s̀è Zwezi-Kərisə nii.

4

Á fwa ku t̀, nə yɪ Yu fɪra

(Romə t̀án 6.6-13, Efɛzə t̀án 4.17-24)

¹ Nə ỳə d̀ə, *Kərisə dí c̀àn v yɪra t̀ wa. Ku m̀l̀u yɪɾɪ, á d̀ə mɛ, sə á ya l̀à t̀, á nə ken á s̀írí, sə á d̀ə d̀é c̀àn, ndə v nə. L̀u t̀, v nə dí c̀àn v yɪra t̀ wa nətu, ku tíú d̀ə v cuna pwè duən nə. ² Ku tíú d̀án ya l̀u t̀, v nə k̀ù ba ləzoni p̀ùé yokukwɪnan fɪra nə twá. Yá d̀ian t̀, ku tíú mu nə ga, sə v fwa luv wa, v d̀án yɪ l̀u t̀, v nə twá Yu fɪra nə. ³ Á dí yáá, á c̀ùg̀ù á m̀áná ku nə d̀áá, á ma fwa ỳèn t̀, l̀à t̀, ba nə yəri Zwezi-Kərisə nə, fwa. Á d̀án yaga t̀ ỳèn t̀ntə. Dí yáá nə, á yà ba á t̀àn janɪ ỳèn t̀ wa. Á yà twá á p̀ùé yokukwɪnan fɪra nə. Á yà nywɪn swana, á bubɪnɪ, d̀ə á d̀é wodirən zənzən,

á ja le, də á tuŋa cavɪyɪən, tə nə lwara zənzən. Á yàá jèń duən nə, á nywɪn swana zənzən. Yá á dǎń bwɪ wɔŋwanan tə nə, ku ga yɪ yoo tə, Yu nə culi cígá cígá. ⁴ Síún nə, á kúbə ba sè á twá là tə, ba nə yəri Zwezi-Kərisə tə, á fwa ba yokukwɪnan tə, sə á pèní duən vɛɛ vɛɛ. Yá ku dǎń gwárí ba. Ku mù nə pɪn, ba dé tɪjaŋa á dèń nə. ⁵ Ba wá tún ba níé Yu yáá con. U mù nə yɪ liù tə, v ken v sírí, sə v bɔ̀rí là tə, ba wulə luw wa, də ba tə ba tɪga, bura. ⁶ Ku mù nə pɪn, ba dǎń swɪn Yu suywǎŋú tə, ba bɪrí tɪga tə nə, də ba tə wà tɪ, yà Yu nə swə v bɔ̀rí ba bura, ku tə yɪrí, ba nə fwa, mǎŋá tə wa, ba nə yɪn luw wa, ba dǎń wá bà ba ya mu wa də Yu.

Á tuŋa zəni də tarpiun, Yu nə pɪn aba

(Likə 21.34-36, Galasi tìán 6.10, Romə tìán 12.5-11)

⁷ Luw wiən tə mama mǎŋá bwələ, sə tə zwè. Ku mɛ, sə á ya là tə, á nə buŋa zəni, á ga yèə yoo dèń, sə á wǎní á jun Yu zəni. ⁸ Sonu yàá pa, ba swèé liù cuna kapupv. Ku mù yɪrí, yoo tə nə wulə tə mama yuu wa, ku mù nə yɪ, sə á sóní duən, mǎŋá mama. ⁹ Á jonə vərə tə, ba nə yɪ *Kərisə là duən, ba nə twi á con, á pa ba zurɪ á diè wa zəni. Á dǎnà ká fwa ku də ŋuŋwɪan. ¹⁰ Á liù mama mɛ, sə v ya liù tə, v nə zɪga diàn, v ga ywǎŋá Yu tarpiun tə yuu zəni. U mɛ, sə v tì tarpiun yiri tə, Yu nə pɪn wá, v ma san là duən tə nə. ¹¹ Liù tə, v nə swɪn Yu sugv tə, ku tíú mɛ, sə v swɪn ku tə, Yu nə ken v nii wa. Liù tə, v nə tuŋa, v pɪn v duən nə, sə ku tíú tə tun də diàn tə, Yu nə pɪn wá. Á fwa nətv, sə dun tə mama wǎní tə twá Zwezi-Kərisə nə, tə ya Yu nyiən. U mù Yu tə nə tɪ dun də diàn mǎŋá də mǎŋá, ku nə ba zwɛ. Amuna!

Kərisə là càn tə yoo

(Matia 5.10-12, Tòtònán 5.41, 14.22, 2 Tesalonikə tìán 1.4-12)

¹² À nubisoni-ba, á wulə càn wa, ndə ba ken aba mən wa. Á dǎnà ká pa

ku dì á yuu, ndə yoo tə nə, ku nə yi yovee. Mə ku wá twá nətu, ba ma lwari də, á ken á waa Zwezi-*Kərisə nə. ¹³ Ku tə nə mə, á yana pupwən wa, á də nə wulə á dó Zwezi-Kərisə cən tə yiri. Á nə dó tə cən tətə, máná tə wa, v nə wá pìi, v bà biri v tiàn v dun tə wa, ku wá pa á sú də v pupwən tə.

¹⁴ Ba nə twin aba, á nə yi Zwezi-Kərisə karbia tə yiri, á yana pupwən wa. Ku mù yiri nə, Yu-*Sigu tə, ku nə jə dun tə, wulə də aba. ¹⁵ Á liù mama kə cígá, v dàn ká dó cən, v nə yi laguru yiri, nə à yèé, v nə yi ɲwìàn yiri, nə à yèé, v nə yi cunu yiri, nə à yèé, v nə kənə v nii, lià yìèn wa yiri. ¹⁶ Yá v dàń nə dí cən, v nə yi Kərisə liù yiri, v dàn ká pa ku cavira ja wá. U mə, sə v pa dun Yu nə, v nə jə Kərisə yiri tə yiri.

¹⁷ Máná yí, Yu nə wá buri lià bura. U wá dí yáá, v buri v tətə lià tə bura. Aa! Nə yi v lià, yá v wá dó yáá v buri nə tətə bura. Ku dàń wá ya nətə, ku pa lià tə nə, ba nə viga, sə ba zìlì v suywánú tə? ¹⁸ Ku púpúnì Yu sagi tə wa, ku wó: «Də ku nə yi cən, ku pa liù tə nə yi cígá tíú nə, sə v nan Yu bura tə jun wa, ku dàń wá ya nətə, ku pa liù tə nə, v nə tun tutunkukwinan Yu nə ba pià, də cuna liù nə?» ¹⁹ Ku mù tə yiri, lià tə, ba nə dó cən Yu fira tə yiri, sə ku tiàn tə fwa zəni wuuu. Sə ba ti ba tiàn mama ba kə Yu jun wa. U mù Yu nə fwa ba, v ga yi pùé nədu tíú.

5

Kərisə lià púlì yoo

(Tutunan 20.28, 1 Timote 3.1-7, Zwakə 4.6, 10, 1 Tesalonikə tiàn 5.6-8, Efəzə tiàn 6.10-18)

¹ Síún nə, à swìn *Kərisə lià púlì yáá tiàn tə con, ba nə wulə á pwéré wa. À də tətə yi yáá tíú don, ndə ba nə. À nì Zwezi-Kərisə, máná tə wa, À də wá twá, à ya Zwezi-Kərisə dun tə wa, Yu nə wá biri. ² Á ywàńá Yu lià tə

yuu, Yu nə pin aba, sə á ywàń ba yuu, ndə payıra nə ywàńá pee yuu nətu. Á dànà ká fwa ku ndə, ku yi ba kálí aba. Á ywàńá ba yuu də á waa mama, ndə Yu nə pià, sə ku ya nətu. Á dànà ká fwa ku, ba nə wá ɲwín aba yiri. Á fwa ku də yaɲwia. ³ Á pian á ya là, ba duən tə nə twá á nə, ba lwarı nətu, ba nə me, sə ba ya. Yu pin là tə, sə á ywàń ba yuu. Á dànà ká dó diàn ba yuu wa. ⁴ Zwezi-Kərisə yi ndə payıra yuu tíú nə. Á nə fwa nətu, dun tə, v nə wá bà, v biri v tiàn, á wá na dun yupuu tə, ku zəni nə ba zwè.

⁵ Á mù ləzwəndun-ba, á siá yáá tiàn tə nii. Á mama muɲə á tiàn duən yáá con. Ku púpúní Yu sagı tə wa, ku wú:

«Yu zıga fwıə là nə, yá v fwa pubwanv là tə yıra, ba nə muɲə ba tiàn.»

⁶ Ku mù yiri nə, á muɲə á tiàn v yáá con, sə v mù nə zín aba yu nə, mánjá tə wa, v nə li v tún. Yu jə diàn tə me yuu wa. ⁷ U mù nə ywàńá á yuu nə. Á kənə yìèn tə mama, tə nə wuwalı aba, v jun wa.

⁸ Á cia á tiàn nə, sə á ya là tə, á nə yəə yoo dən. Á dànà ká dwè. *Sıtana yi á duɲv. U yi ndə gəru nə, ku baa, ku kıkarı, ku ga pià liù, sə ku dó. ⁹ Á kənə á waa Zwezi nə wuuu, sə á zıɣı diàn, á ta Sıtana. Á dən ga yəə də, là tə duən, tə ba nə yi á nubia Kərisə yiri, ba nə wulə luu bwálí mama, də na càn, ndə á də nə.

¹⁰ Yu dən nə fwa pubwanv á yıra. U twá də Zwezi-Kərisə, v kúrí aba, sə á ya v dun tə wa, tə nə ba zwè. Á wá dó càn mánjá mancın. Ku kwa nə, Yu tətə wá kwen aba v zıɣı. U wá pa á zıɣı diàn á ma twá Zwezi-Kərisə nə, á ga wá dən á jìàn. Yá won kúù ba wàní, ku pa á pıí á kə á kwa. ¹¹ U mù nə jə diàn, mánjá də mánjá, ku nə ba zwè. Amuna!

Sagı tə yígúré sùràn

(1 Tesalonikə tiàn 5.23-28)

¹² Siləven yi nə nubiu *Kərisə yiri, v nə twá v nə də pùé nədu. Yá à dən twá v nə, à ma púpúní sagıbiə ku tə á nə. À púpúní á nə, sə à ma kwè aba,

à ga biri aba Yu pubwanu tē nē yi nētu, ku pa aba, cígá mama. Á dūga á
tìàn á pa Yu pubwanu tēntē nē. ¹³ Kərisə lià púlí tē, ku nē wulə Babilɔnə nē
tē, jùnì aba. Ba yi lià tē, Yu nē kúrí, ndə á də nē. À bìú Marəkə də jùnì
aba. ¹⁴ Á jùnà duən də zìlɔ zənzən də sonu, ndə Kərisə lià nē mē, sə ba fwa
nētu.

Yu wá pa bican sié á mù lià tē mama nē, á mù də Zwezi-Kərisə nē vwə
duən nē.